



59528
Mag. St. Dr.

Inater Casimiri: Triquetrium Philosophicum, itaque
ritus casu biennati emendatam seu Conclusionem
ex prima universae Aristotelis Philosophiae
speculativae scientia.

Biblioteka Jagiellońska



stdr0001738

✠
In Nomine Domini, Amen.

TRIQUERTIUM PHILOSOPHICVM,

Stagyritico Cursu Biennali

EMENSUM:

SEU

CONCLUSIONES

EX TRINA UNIVERSÆ ARISTOTELIS PHI-
LOSOPHIÆ SPECULATIVÆ SCIENTIA,

Ad mentem Divi THOMÆ,

Doctoris Angelici



CONCINNATÆ.

Quas in sui Præsentia proposuit,

M. IOSEPHVS
WISNIOWSKI,

Philosophiæ Doctor, Collega Maior,
Astrologiæ & Geometriæ Ordinarius, ac in-
terea, Cursus Vladislaviani Professor, Eccle-
siæ Collegiæ S. ANNÆ Scholasticus.

Propugnandas verò in Sapientissima
eruditorum Corona

SUSCEPIT

M. CASIMIRUS TUATER Crac:

*Philosophiæ Doctor, Scholæ ad Ecclesiam Cathedralem
Cracoviensem Senior, uti eiusdem Cursus Auditor.*

Anno Domini, 1693. Die 4. Martij.

CRACOVIAE, TYPIS UNIVERSITATIS.



B. IOANNES CANTIVS

In Alma Academia Cracoviensi S. Theologiae
Doctor et Professor, Patronus Poloniae

59528 REGNI SARMATIAE & ACADEMIAE PATRONO.

Doctrinae Salutaris perfectissimo MAGISTRO.

Stagyritae Catholico, cuius Philosophia, quiescit est disciplina,

Mundanae Sapientiae Contemptori, solus Caestis Sectariorum,

Optimo Praeceptorum, qui in sua Doctrina se totum descripsit.

Theologiae JOANNIS fidelissimo Dictatori, (nam & ipse JOANNES,) qui non satis
arbitratus Charitatem ad proximum docere argumentis, sed potius profiteri factis,

Academiae solidissimo Fundamento, Magistralis perfectionis viva Regulae,

Verae Humilitatis Viatori, Supremae Celsitudinis Comprehenfiori,

ac Caestium Gratiarum Delicio,

DIVO JOANNI CANTIO,

in Vniverfitate Crac: S. Th: Doctori & Profefiori,

uti Patriarchae fuo, in vim Votivi Homagij.



CONCLVSIONES

EX UNIVERSA PHILOSOPHIA SPECVLATIVA.

Ex Disputatione Prooemiali.

Philosophia rationabiliter & vtiliter inuenta est, magno humani generis bono. Hæc in communi sumpta, rectè dicitur esse Cognitio rerum vt sunt, cum pro Fine habeat Cognitionem Veritatis. Ratione Obiecti adæquatè diuiditur in Rationalem, Naturalem, & Moralem. Ratione Finis in Speculatiuam & Practicam, vtrobiq; tamen Analogicè, Speculatiua est nobilior, & secundum se prior & certior, quam Practica. Inter Philosophiæ Speculatiuæ Partes, Ordo Doctrinæ tametsi requiratur à Mathematica esse exordiendum, receprissimus tamen, maximè Acquisitionis Ordo vsurenet, à Logica ad Physicam, & ab hac ad Metaphysicam, in docendo & discendo esse procedendum.

CONCLVSIONES LOGICÆ.

I.
Præter Logicā Naturālē, datur Logica Artificialis, in quam Homo naturaliter & ab intrinseco inclinatur ratione Speculationis & cognitionis Veritatis, licet magis in reliquas Scientias Reales Speculatiuas. Hæc quoad omnes suas Partes, Demonstratiuam .i. Topicam & Sophisticam, rectè diuiditur in Docentem & Vttem, tanquam in duos Habitus Distinctione Virtuali Formali distinctas. Docens, est verè & propriè Scientia vna specie, habetq; Vnitatem Specificam ab vno Obiecto in Esse Scibilis. Vtens, Entitativè tantum est Scientia, non autem propriè & Formaliter, nisi forte Reductiue & in Obliquo. Vtraque tamen est Simpliciter Scientia Speculatiua, licet Vtens secundum quid & Analogicè possit dici Practica, imò & Ars. Est autem simpliciter necessaria ad acquirendas alias Scientias, tam in statu perfecto, quam in imperfecto, non tamen æquè ad omnes.

II.

Formale & Adæquatum Logicæ Obiectum, seu Ratio Formalis Quæ, est Ens Rationis, Actuum seu Operationum Intellectus directivum. Ratio verò Formalis Sub qua, est Abstractio ab omni Materia Negatiue, nec non Principia Rationis ex quibus procedit in demonstrando. Vnde Ens Rationis contractum, vel ad Argumentationem, vel ad Modum sciendi strictè sumptum, & differendi, vel ad Syllogismum aut Demonstrationem, non potest esse Formale & Adæquatum Logicæ Obiectum: tametsi Voces, Res, siue Naturæ Rerum, imò & Operationes Intellectus, in quantum sunt Principia & Causæ Efficientes Secundarum Intentionum, possint esse Obiectum, Materiale illius.

III.

Ens Rationis Logicum datur, cuius totum Esse Obiectiue se habet in Intellectu sitq; à solo eoque Humano, per Actum illius Comparativum, & tantum pro hoc statu. Vnde neque Voluntas, neque Sensus Interni aut Externi, possunt efficere Formaliter Ens Rationis. Præterea neque Angelicus, multò minus Divinus Intellectus format Entia Rationis, licet ea ab Humano Intellectu formata cognoscat. Porro à nobis cognoscitur per Speciem

ciem Expressam propriam, per Impressam autem alienam .f. Entis Realis. Et tandem adæquatè diuiditur in Negationes, Priuationes & Relationes Rationis.

IV.

VNiuerſalia Materialia, aliàs Fundamentalìa (quæ sunt Naturæ uniuerſales, Vniuocè communes multis) dantur à parte Rei, non quidem ſeparata à Singularibus, vt voluit Plato, ſed illis inexistentiã, à quibus nec per Abſolutam quidem Dei Potentiã Realiter ſeparari poſſunt. Hinc uniuerſale rectè dicitur Eſſe Vnum commune, aptum in eſſe multis, prædicarique de illis. Natura Uniuerſalis Creatã, eſſi præter Materialem ſeu Numericam, habeat à parte Rei Vnitatem Formalem, (Virtualiter ab illa diſtinctam) communem pluribus, non tamen Poſitivam ſed Negatiuam, quatenus ei non repugnat, vt à ſingularibus per Intellectum abſtrahatur & fiat Comuniſ ſecundū Eſſe ſuum Obiectivū. Uniuerſale Formaliter ſumptum, cum non detur à parte Rei, proinde fit per Operationem Intellectūs Poſſibilis Comparatiuam Simplicem, quanquã ad id Præciſiua quoque concurrat. Et taliter ſumptum Uniuerſale, adæquatè & vniuocè diuiditur in Quinque Prædicabilia, nempe in Genus, Speciem, Differentiam, Proprium & Accidens, eſtque Genus ad illa.

V.

Genus eſſi non Eſſentialiter, rectè tamen à Porphyrio definitur. Eſſe id quod prædicatur de pluribus Specie differentibus in eo quod Quid eſt. Eius Definitum explicatum Particulã Quod, eſt Secunda Intentio Generis in Concreto, ipſa videlicet Genericiſ, connotans ſimul Naturam Genericam denominatam, quod idem in alijs Prædicabilibus proportionaliter intelligendum. Idem Metaphyſicè ſumptum, non prædicatur de Speciebus, vt Pars, ſed vt Totum Potentiale, quod etiam de Differentia proportionaliter cenſendum: & ideo qua tale, non poteſt ſaluari in vnica ſpecie. In Subſtantijs Materialibus, Genus à Materia, & Differentia ſumitur à Forma, tanquam à Prima Radice. In Immaterialibus verò vg. in Angelis, Genus & Differentia ſumitur à tota earum Eſſentia diuerſimodè conſiderata. In Accidentibus tandem Genus & Differentia ſumitur Proximè à tota illorum Eſſentia. Radicaliter autem Genus ſumitur ex proprio Modo conſtitutiuo Prædicamenti, Differentia verò ex diuerſitate ſuorum Subiectorum.

VI.

Species per Prædicari de pluribus ſolo Numero differentibus in Quid, definita, in ratione ſecundi Prædicabilis Logici conſtituitur Formaliter per Prædicabilitatem de Indiuiduis, & non per Subiiciuitatem, iuxta hanc enim ſpectata, Metaphyſicè ſaltem eſt Uniuerſalis: vnde ſic accepta totaliter ſaluatur in vnico Indiuiduo. Obindeq; Natura Specifica Angeli, tametiſ repugnet ei habere plura Indiuidua, eò, quòd in ſe fit ſingularis, immaterialis & conſtituta in Eſſe Specifico & Indiuiduali, Michaelis v.g. aut Gabrielis; ex modo tamen noſtro concipiendi poteſt concipi vt Uniuerſalis. Indiuiduum quoque (vt pote Speciei Correlatiuum) illudque Determinatum & Secundo Intentionaliter ſumptum, prout dicit Relationem Prædicabilitatis, rectè dicitur Eſſe id, quod de vno ſolo, hoc eſt de ſeipſo prædicatur.

VII.

Differentia latè ſumpta, rectè quidem, ſed Analogicè diuiditur in Communem, Propriam & Propriiſſimam. quarum duæ priores cum non faciant differre Eſſentialiter, ſola proinde Differentia Propriiſſima idipſum præſtans, conſtituit hoc tertium Prædicabile. Rectè etiam definitur per Prædicari de pluribus & Specie differentibus in Quale Quid, puta Eſſentiale. Et hæc Definitio competit tam Differentiæ Subalternæ, quam etiam Athomæ ſeu Inſimæ, eſſi magis propriè illi, quam huic. Ex his autem ſicut Athoma ſeu Specifica conſtituitur in Eſſe tertij Prædicabilis per ordinem ad Indiuidua huius Speciei,

Speciei, ita Subalterna seu Generica per ordinem ad Generis Subalterni Species. Porro Omnis Differentia est perfectior suo Genere, quæ duo Virtualiter tantum inter se distinguuntur.

VIII.

EX quaternaria Proprij acceptione Analogæ quidem sed tamen Adæquata, solum Proprium quarto modo sumptum constituit quantum in ordine Prædicabile, ut pote quod refertur per ordinem ad omnia Individua illius Speciei, à cuius Essentia dimanat: soli autem inest & de inferioribus eius prædicatur in Quale Necessario Accidentaliter & Conuertibiliter.

IX.

Accidentis Logici vulgata Definitio, Secundo Intentionaliter intelligi debet. Quod quidem ut est quintum Prædicabile, constituitur in Esse Vniuersalis per ordinem ad Subiecta, quæ Accidentaliter denominat, non ut per ordinem ad sua Inferiora, de quibus Essentialiter prædicatur.

X.

Equivoca, Vnioca & Denominativa rectè traduntur ab Aristotele, quorum prioribus duobus mediant Analogæ, in Attributionis & Proportionalitatis diuisa. Conuenienter quoque ab eodem assignantur Divisiones & Regulæ Antepredicamentales.

XI.

Prædicamentum in communi rectè dicitur esse Quidditatiua Prædicabilium coordinatio Secundum Sub & Supra. Diuiditur in Decem Prædicamenta, seu Summa Genera, quæ sunt Primò Diuersa, ita ut se totis differant & in nullo conueniant Vnioco. Reponuntur autem in illis Directè sola Entia Realia Creatæ, Finita, Per se, Completa, Incompleta, Vnioca & Essentialia.

XII.

Substantiæ (ut pote prioris Accidentibus Definitione, Cognitione, Tempore & Natura) Ratio Formalis est, Esse Per se Nominaliter. Et hæc Substantia quatenus abstrahit à Modis Essendi Vniuersaliter & Particulariter, rectè diuiditur in Primam & Secundam, ita ut Prima in ratione Substanti sit magis & perfectior Substantia quàm Secunda. In hoc Prædicamento Directè reponuntur omnes & solæ Substantiæ Creatæ, Completa & Finitæ, imò & Christus Dominus secundum Naturam Humanam consideratus, licet non secundum Suppositum, quod est Diuinum. Hæc quoque spectant & Angeli.

XIII.

Quantitatis Ratio Formalis constitutiua est Extensio Partium in ordine ad se. Et hæc rectè ac vniocè diuiditur in Continuum & Discretam. Continua quidem Intrinsecè mensurans Substantiam, tres continet Species, Lineam videlicet, Superficiem & Corpus. Extrinsecè reliquas, Locum, s. & Tempus. Discreta verò Numerum & Orationem, licet hæc minime propria sit Species Quantitatis. Porro Substantia Corporea cum Quantitate ita sunt inter se connexæ, ut eum ad inuicem Realiter distinguantur, illa præcisâ Quantitate Actuali, nullas habet Partes Integrales, etiam Entitatiuas.

XIV.

Qualitatis Prædicamentalis Ratio Formalis est Dispositio seu Modificatio Substantiæ specialiter & sine addito sumpta. Hæc rectè & vniocè diuiditur in quatuor Species non quidem Athomas sed Subalternas, s. Habitum & Dispositionem. Naturalem Potentiam & Impotentiam, Passionem & Patibilem Qualitatem, & Formam ac Figuram.

XV.

Relationes Prædicamentales (quæ omnes sunt Reales & æquales in Modo Essendi Relatiuo) dantur à parte Rei, quæ præter communem alijs Accidentibus Conceptum In, habent proprium Ad, sane Aptitudinalem. Ultra Remota Relationis Fundamenti quatuor, videlicet Substantiam, Quantitatem, Qualitatem, & tandem Potentiam Activam & Passivam, con-

tur Proxima, quæ sunt Vnitas & Numerus, Actio & Passio, Mensura, & Mensurabile. Omnis Relatio Prædicamentalis distinguitur Realiter à suo Fundamento, nedum Remoto, sed etiam Proximo. Transcendentalis verò non item. Et sicut Mutua terminatur ad Terminum Formaliter Relativum, ita Non mutua ad Absolutum. Porro cum Relatio suam Vnitatem, & Distinctionem Specificam desumat tam à Fundamento quam à Termino Totali Formaliter sumptis, Numericam verò ab Vnitate Subiecti cui inhæret. Hinc est quod Multiplicatis eiusdem Speciei Terminis, non multiplicentur in eodem Subiecto Relationes Numero distinctæ; licet Multiplicatis Specie distinctis Terminis, multiplicentur quoque Specie distinctæ Relationes, maxime si diuersus sit earum fundandi Modus.

XVI.

VLtima sex Prædicamenta sunt Entitates Reales inter se distinctæ, quæ resulant in Rebus cum dependentia ab aliquo Extrinseco, non tamen per hoc sunt puræ Denominationes Extrinsecæ, proinde sunt Absoluta, & constituunt distincta Summa Genera.

XVII.

Postprædicamenta rectè & sufficienter ab Aristotele assignantur Quinque, nimirum Oppositio, Prius, Simul, Motus & Habere.

XVIII.

Oratio rectè dicitur esse Vox significatiua ad placitum, cuius pars aliqua separata significat aliquid. Vnde Voces non solum sunt signa Rerum, sed etiam Coceptuum, & quidem immediatius. Oratio tanquam Totum Integræ diuiditur in duas partes, Nomen .s. & Verbum. Propositio verò, quæ est simplex Qualitas, describitur, quod sit Oratio verum vel falsum significans. Præter alias sui Diuisiones, Vniuocè diuiditur in Affirmantem & Negantem, Proprietates eius sunt tres, Oppositio, Equipollentia & Conuersio. Propositiones pro diuersitate materię diuersimodè quoq; se habent ad veritatē. Exindeque In Propositionibus Contradictorijs singularib⁹ de Futuro Contingenti, neutra Contradictoria est determinatè vera aut falsa, ante Decretum Dei. cum hoc tamen optimè cohæret Libertas Causarum Secundarum, & Contingentia futurorum Effectuum.

XIX.

Definitio rectè dicitur esse Oratio explicans Naturam Rei. Diuisio autem Oratio explicans Rem per partes. Discursus est Oratio in qua vnum ex altero inferri denotatur; Vnde sicut pro Formali dicit Motum Intellectus de vna cognitione in aliam, ita ad sui Rationem requirit pluralitatem Cognitionum, non reperiturq; in Intellectu Diuino & Angelico. Discursus Artificialis in communi ratione Formæ rectè & vniuocè diuiditur in Consequentiam strictè sumptam & Argumentationem, hæc verò in Conditionalem, Causalem & Rationalem. Porro Argumentatio Rationalis strictè sumpta, duas tantum habet species, Syllogismum .s. & Inductionem.

XX.

Syllogismus communissimè quidem, at rectè definitur, quod sit Oratio in qua quibusdam positis, aliud quiddam diuersum ab his quæ posita sunt, necessariò accedit, eò quod hæc posita sunt. Et hic quidem ratione Formæ Vniuocè diuiditur in tres tantum Figuras, quarum singulæ habent suos Modos.

XXI.

Omnis Cognitio Intellectiua Discursiua fit ex præexistenti Cognitione, convenienterq; ad illam requiruntur duæ Præcognitiones, & tria Præcognita. Præter Finem Demonstrationis, nempe ipsum Scire, Essentialiter per Causam Materialem exprimitur Demonstratio, quod sit Syllogismus procedens ex Principijs seu Præmissis veris, primis & immediatis, notioribus, prioribus Causisq; Conclusionis. Hinc Præmissæ Demonstrationis efficienter influunt

fluunt in Conclusionem, & necessitant Intellectum directè ad assentiendum illi, non solum Necessitate quoad Specificationem, sed etiam quoad Exercitium. Porro Demonstratio adæquatè diuiditur in Demonstrationem Propter Quid, & Quia, tanquam in Species Contradictoriè oppositas, quarum sola Propter Quid generat Habitum Scientiæ perfectæ.

XXII.

Scientia est vna & simplex Qualitas, & non composita ex pluribus. Actualis, est cognitio Rei per Causam, propter quam Res est, & quod illius sit Causa, nec possit aliter se habere. Et ex hac relinquitur in Intellectu Scientia Habitualis, quæ est Habitus certus & euidens, per Demonstrationem acquisitus. Scientia suam vnitatem & distinctionem Genericam desumit à Ratione Formali Sub qua, alias Abstractione. Specificam ex vnitatem & distinctione Specifica Principiorum Formalium intra eandem Abstractionem contentorum. Et tandem Numericam (vt pote Accidens) à Subiecto.

XXIII.

Scientia comparatè, nimirum ratione dependentiæ considerata, rectè diuiditur in Subalternantem & Subalternatam. Vnde si Obiectum Subalternatæ Accidentaliter continetur sub Obiecto Subalternantis, propriè illa Subalternata dicitur. Quod si Essentialiter, impropriè. non tamen propterea amittit rationem veræ & propriæ Scientiæ. Scientia & Opiniò tum quoq; Fides, siue sumantur pro Actibus siue pro Habitibus, non possunt simul esse in eodem Intellectu de eodem Obiecto, bene tamen Habitus Scientiæ cum Actu Opinioni, sed non è contra. Porro Habitus vtriusq; nonnisi per Absolutam Dei Potentiam, in eodem Intellectu, circa idem Obiectum, simul consistere possunt.

XXIV.

DE Syllogismo Topico, qui ex Propositionibus probabilibus, probabilem, quoq; infert Conclusionem, & de Sophistico, qui ex apparenter veris, deducit omnino falsum, Aristoteles rectam & sufficientem reliquit doctrinam, illius quidem per Locos & Problemata seu Prædicata, huius verò per Fallacias in Dictione & extra Dictionem traditas.

CONCLUSIONES PHYSICÆ.

Ex Disputatione Proœmiali.

Physica est verè & propriè Scientia, illaq; Speculatiua & Vna Specie aethoma, cuius Formale & adæquatum Obiectum est Ens Mobile Radicaliter sumptum. Et cum Vniuersalia sint nobis notiora quam minus Vniuersalia, ideo iure merito hic Doctrinæ Ordo in tradendis Physicæ Partibus seruatur.

EX LIBRIS OCTO PHYSICORVM.

I.

Principia Rerum Naturalium, (quæ neq; ex alijs, neq; ex alterutris, sed ex ipsis omnia fiunt) In Fieri sunt tria. Materia Forma & Priuatio. quorum Forma & Priuatio sunt Contraria & quidem Prima. In Facto Esse sunt duo, Materia & Forma. obindeq; Ratio Principij Analogicè tantum & non Vniuocè illis comperit.

II.

Materia prima, (quæ est Verum Ens Reale, Substantialè, Incompletum, à Deo in primo Mundi exordio Rebus concreatum) rectè definitur ab Aristotele, quod sit Primum Subiectum vniuscuiusq; Rei, ex quo aliquid fit, cum insit Per se, & non secundum Accidens, & si corrumpitur aliquid, in hoc abibit vltimum. Est ita pura Potentia Physica, vt nullum includat Actum siue Metaphysicum, siue Entitatum. obindeq; nullam habet Existentiæ propriam, adeo, vt ne quidem per Absolutam Dei potentiam possit ex-

stere sine omni Forma. Præterea est Per se ingenerabilis & incorruptibilis, non quidem Subiectiue sed Terminatiue, habetq; Appetitum Innatum ad Formas Substantiales, tum quoq; Vnitatem Specificam & Numericam, aut non Positiuam, sed Negatiuam.

III.

Priuatio quatenus dicit Aptitudinem (quam significat in Obliquo) ad Formam causandam, est Principium Rerum Naturalium in Fieri, à Materia & Forma Realiter, sed ab illa Negatiue distinctum. Estq; carentia seu priuatio Formæ Specificæ quatenus indiuiduatæ. Actualiter principiat Generationem Substantialem recedendo, Formam interim accedente.

IV.

Forma Substantialis rectè dicitur esse Actus primus seu Substantialis dans Esse Corporeum rei per se constitutæ. Hinc omnes Formæ Materiales generabiles educuntur de potentia Materiæ, non tamen ingenerabiles & creatæ, vt sunt Cælestes & Elementares, multoq; magis Anima Rationalis. Porro omnes Formæ Accidentales Naturales, quæ non habent necessariam connexionem cum Subiecto, educuntur de potentia Subiecti, similiter & Supernaturales, licet eas contingat simul fieri cum Subiecto. Connaturales tamen quæ dimanant ab Essentia Subiecti, non tam educuntur, quam potius ad rationem sui Subiecti cœducuntur vel concreantur. Deniq; plures Formæ Substantiales tam Subordinatæ quam Disparatæ, etiam per Absolutam Dei Potentiam, non possunt informare Vnam portionem Materiæ, sicut nec è conuerso.

V.

Totum Compositum Physicum Essentialiter constat ex Materia & Forma, tanquam ex partibus eiusmodi, quæ simul concurrunt ad Essentiam illius, nec datur Modus aliquis Vnionis Substantialis Realiter distinctus ab illis, sed vniuntur inter se per suas proprias Entitates. Idem Totum non distinguitur Realiter à suis Partibus simul sumptis & vnitis, nisi Ratione Ratiocinata.

VI.

Natura rectè & Essentialiter definitur, quòd sit Principium & Causa Motus & Quietis eius in quo est, primò & Per se, & non secundum Accidens. Et licet Forma sit magis Natura quàm Materia, id est principalior, Vniuocè tamen de vtraq; dicitur Ratio Naturæ. Distinguitur Essentialiter ab Arte, Arsq; nullo modo Virtute propria & immediate potest efficere opera seu Effectus Naturæ.

VII.

Causa in communi rectè dicitur id, ad cuius Esse reale sequitur aliud. Diuiditur in quatuor Causarum Genera, Videlicet Materialem, Formalem, Efficientem & Finale. quarum duæ priores Intrinsecæ, duæ verò posteriores, Extrinsecæ passim nominantur. Porro licet Omnis Causa sit prior suo Effectu, Prioritate Naturæ seu Dependentiæ, non tamen Simpliciter est perfectior & nobilior eodem, Realiter nihilominus distinguitur ab eo. Tandem Vnus idemq; Effectus, à pluribus Causis Totalibus, Adæquatis & Principalibus, eiusdem Generis & Ordinis, nedum Viribus Naturæ, sed nec per Absolutam quidem Dei Potentiam produci potest.

VIII.

Materiæ Causalitas totalis & adæquata est Concursus seu Influxus Passiuus in Formam & Compositum, vt est In Materia & Ex illa. Formæ verò Causalitas est Concursus Actiuus, seu Informatiuus Materiæ & Compositi, vt est à Forma. Causa porro Exemplaris, propriè & simpliciter loquendo, habet rationem Causæ Formalis Extrinsecæ.

IX.

Efficiens Causa est, à qua primò incipit Motus, habetq; pro Causalitate, ipsum Agere seu Actionem exercitam. Vnde in productione Substantiæ, Principium operandi Quo mediatum, est Forma Substantialis, immediatum verò sunt Formæ Accidentales. Causa prima Actu & immediate concurrat ad omnes Actus omnium Causarum secundarum, idq; non tantum Concursu

Simul.

Simultaneo, sed etiam Præiudicio, in Causis tamen Liberis determinatione Voluntatis non per modum Naturæ, sed per modum Liberi. Ad Efficientem quoque Causam reuocantur Casus & Fortuna, tanquam Causæ Per accidens ad Causam Per se, tum quoque Fatum. Proinde Radix proxima Contingentiæ in Rebus Naturalibus, præter efficacissimam Dei voluntatem, est Defectibilitas Causæ Proximæ, & Impedibilitas per concursum alterius Causæ. Necessitatis verò è contra, Indefectibilitas eiusdem Causæ.

X.

Finis est vera Causa Realis, obindeque constituitur Formaliter in Esse Termini motui mouendo voluntatem secundum Esse Reale, non verò secundum Esse Intentionale seu Apprehensum, sic enim Motui tantum habet Rationem. Unde Causalitas Finis, dicta communiter Motio Metaphorica, consistit in Actione Voluntatis, seu in ipso Appetitu & Desiderari.

XI.

Motus rectè dicitur esse Actus Entis in potentia prout est in potentia, contineturque in se etiam Mutationes Instantaneas, sed eas tantum quæ sunt Actus imperfecti. Et licet Entitas Motus Materialiter & Entitativè eadem sit cum Actione & Passione, Formaliter tamen & Modaliter est distincta ab illis, & à Termino Ad Quem, prout & ipsa Actio & Passio distinguuntur ab invicem. Subiectatur autem Motus in Mobili, eiusque Actio Transiens licet sit Originativè ab Agente, Subiectivè tamen est in Passio. Porro sicut Vnitatis Specifica & distinctio Motus desumitur ex Termino Ad Quem simul cum Vnitate Medij Formalis; ita Numerica ex Vnitate Mobilis, Termini Ad quem & Temporis non interrupti. Ac tandem Generica ex vnitatis Prædicamenti ad quod terminatur.

XII.

Infinitem Creatum Cathegorematicum seu in Actu, per nullam potentiam dari potest, licet detur Syncathegorematicum seu in Potentia.

XIII.

Loci Ratio Formalis est Immobilitas vltimæ superficiæ Corporis continetis. Et hæc Immobilitas desumitur ex Distantia Formaliter sumpta in ordine ad Polos & centrum Mundi. Hinc omnibus & solis Corporibus convenit Esse Per se in Loco Circumscriptivè, excepto vltimo Cælo ut pote Continente, quod est secundum Partes & in Potentia. Porro licet Duo Corpora possint esse supernaturaliter per penetrationem in vno eodemque Loco: Vnum tamen Corpus in pluribus Locis Circumscriptivè, etiam per Absolutam Dei Potentiam nequit esse. Vacuum per nullam virtutem Creatam dari potest in Rerum Natura, bene tamen per Increatam, quo dato posset moveri Corpus per illud Motu Successivo.

XIV.

Tempus quoad Actum primum (qui est Mensura Radicalis) est Simpliciter & verum Ens Reale. Eius Existencia solum invenitur in Instanti, non verò in aliqua Parte Præsenti. A Motu distinguitur, ut Realitas à Realitate.

XV.

Continuum non ex solis componitur Indivisibilibus, sed etiam ex Partibus Formalibus quæ per vera & Positiva Indivisibilia sunt unitæ. Unde in Substantia ante Quantitatem cum non dentur Partes Integrales etiam Entitativæ, certè nec Indivisibilia dari possunt. Res Permanentes ex sua Natura incipiunt per Instans Intrinsecum, & desinunt per Extrinsecum. Successivæ autem incipiunt & desinunt per Instans Extrinsecum. Porro licet vni entia habeant Terminum Magnitudinis suæ, scilicet Maximum quod sit, quem Naturaliter loquendo, excedere non possunt; non tamen habent illum Non Viuentia, unde in infinitum augeri possunt in Potentia. E contra verò tam Viuentia, quam Non viuentia habent certos Paruitatis suæ Terminos, scilicet Minimum quod sit.

XVI.

Christianæ prorsus Philosophiæ Axioma est: Omne quod movetur, necessario ab aliquo à se distincto moveri. Per hoc enim sicut Processus in infinitum

tum in Causis tollitur deueniendo ad Primum Motorem; ita Necessitas Influxus Præuij Causæ Primæ optimè infertur. Omne tamen Mouens seu Agens, ad hoc vt producat Effectum suum, debet esse approximatum Passo, vel vtrâq; Immediatione, Suppositi .f. & Virtutis, vel saltem Immediatione Virtutis, vtrobiq; tamen per virtutem à se diffusam non prius agendo in Distans, quàm in Propinquum. XVII.

MVndum potuisse esse ab æterno tam quoad Res Permanentes, quàm quoad Successiuas, Per se loquendo non implicat, licet Per accidens aliquibus repugnare possit. De Facto vnus est Mundus, illeq; in suo Genere perfectus, quanquam de Possibili non repugnet produci plures multo perfectiores. Hinc ex Motu in eo contento optimè colligi potest, quòd omninò detur Primus Motor immobilis, vnus, æternus, simplex, infinitè perfectus, & virtutis infinitæ ad agendum, perfectissimè intelligens ac volens, pro Obiecto Intellectionis ac Volitionis suæ primario habet seipsum, pro secundario verò omnia à se creata, quæ non solum Efficienter, sed etiam Finaliter mouet.

EX LIBRIS DE CÆLO ET MVNDO.

I.

Cælum neq; est Elementum, neq; Elementatum, compositum tamen ex Materia & Forma, Animatum Causaliter per Formam Assistentem & ab intrinseco incorruptibile. Materia Cælorum est diuersa specie a Materia Sublunarium, tali diuersitate ortâ non ex Entitatibus suis præcisè, sed ex diuerso respectu ad Formas. Cæli quoad Orbes, quò superiores, eò sunt nobiliores, licet non quoad Astra; suntq; Solidi, Contigui, Denarium non excedentes Numerum, id quod Parallaxes, Velocitas & Tarditas Motûs, & tandem Eclipses Planetarum ac Stellarum, solidâ Astronomorum curâ inuentæ euincunt: Revolutionumq; suarum certò definitas habent Periodos. Sphæræ septem Planetarum excepto Firmamento, componuntur ex Orbibus partialibus, Eccentricis nimirum & Epicyclis. Omnium insuper Cælorum Motus ita est Sympathicus cum Motu Sublunarium, vt illo cessante, hunc quoq; quoad Actiones Materiales (licet non Spirituales & Intentionales) cessare sit necesse.

II.

Cælum tametsi directè & Per se agat in Corpora, in Intellectum tamen & Voluntatem indirectè tantum & Per accidens, magis adhuc indirectè in Voluntatem quàm in Intellectum. Hinc purè Astrologicæ prædictiones, etsi de alijs Accidentibus vitæ, tum vel maximè de Actibus humanis, a Voluntate tanquam Causa sua Proxima procedentibus, in tantum verificantur, in quantum Homo inclinationem Sensualitatis Naturæ sequitur. iuxta illud Dni Alberti Magni in suis Mineralibus: Homo duobus regitur principijs, Natura .f. & Voluntate; Natura subiecta est Syderibus, Voluntas autem libera.

III.

DE Astronomicis verò prædictionibus, supposito diligenti Motuum Cælestium ex probatis Tabulis Calculo, dubium non est, quin sint veræ, vt pote de Eclipsibus, Ortu, Culminatione, Occasu & cæteris Sygijis. Insuper omnes Stellæ tam Fixæ quàm Errantes seu Planetæ mutuuntur lucem a Sole, ita tamen vt aliquid ex se lucis habeant, quod vel maximè apparet in Eclipsi Lunæ, in qua tunc fit vera & realis priuatio luminis per incidentiam Lunæ in Vmbra Terræ, orta ex interpositione Terræ inter Solem & Lunā. quod non fit in Eclipsi Solis, quæ est solū in Terra priuatio luminis Solaris, propter interpositionem Lunæ inter Aspectum nostrum & Solem. Et sicut Solis Eclipsis accidit in Nouilunijs, ita Lunæ in Plenilunijs sed non in singulis, prout nimirum in vel prope Nodos Eclypticos Luminaria coniuncta vel opposita fuerint.

IV.

Dantur Dies Critici, quibus subita fit Morbi mutatio ad sanitatem aut mortem, causanturq; cum ab alijs Planetis, tum vel maximè a Motu Lunæ, sumpto

sumpto eiusmodi Crisis initio à loco Lunæ die decubitus infirmi; quod exactius probant Astrologica Directiones, Aspectus Revolutiones, ac positurae Significatorum in Genesi cuiusvis infirmi. Dantur præterea Anni Climacterici tam Hebdomatici quam Enneatici, Ætati humanæ, Regnis & Rebus omnibus summè noxijs, ex quibus sunt periculosi a Natiuitate cuiusq; Annus 21 & 49. maximè verò periculosissimus 63. ob fundamenta & rationes Astrologis notas.

EX LIBRIS DE GENERATIONE ET CORRUPTIONE,

I.

Generatio in communi eaq; Creata rectè dicitur esse Mutatio Naturalis de Non esse, ad Esse. Et hæc præcisè sumpta, est Actio realiter distincta ab Alteratione. Subiectum Generationis Substantialis, dictum Transmutationis, est Materia prima, Terminus verò Totalis & Adæquatus illius est Compositum Subsistens. Corruptio Substantialis est Mutatio Naturalis de Esse ad Non esse, Vnde Terminus eius est Suppositum Corruptum; estq; Naturalis respectu Naturæ Vniuersalis, non item Particularis. Distinguitur Formaliter à Generatione quatenus est Mutatio, licet in ratione Actionis identificetur cum ea. Hinc illud commune Axioma: Generatio vnius, est Corruptio alterius. intelligi debet non Formaliter & Identicè, sed Concomitanter. Eadem tamen Accidentia Numero non manent in Genito, quæ erant in Corrupto, sed alia his similia, vel certe eadem Specie.

II.

Alteratio est Motus de vna Qualitate contraria in aliam contrariam, extremam vel mediam successiue acquisibilem. In hac Intensio Qualitatis fit per maiorem radicationem in Subiecto, seu per additionem Modorum maioris Radicationis. Et præterea In Alteratione Motus Intensionis & Remissionis continuus, etsi Per se primò terminetur ad solas Tertiæ Speciei Qualitates, attamen Primæ Speciei Qualitates possunt etiam terminare Alterationem, sed Secundariò.

III.

Avgmentatio licet proveniat ex Nutritione, Realiter nihilominus differt ab illa. Vtraq; tamen harum est Motus Continuus Successiue fieri natus. Et propriè quidem ac rigorose sumpta Augmentatio solis competit Viuentibus; quatenus verò distinguitur à Nutritione, non durat toto Vitæ tempore, sed tantum ad determinatum tempus. Viuens tamen permanet idem Numero toto Vitæ suæ tempore, augmentaturq; secundum omnes suas partes, vt Homo in altum ad Annum 25. ita vt ex suo Quinquennio (in quo dimidium suæ Staturæ obtinere solet) Quantitas proceritatis eius optimè cognoscatur.

IV.

Agens quoduis Physicum communicans in Materia cum suo Passio, existens in potentia ad Formam Passi contrariam & in præ Sphæram actiuitatis illius, repetitur ab eo: Vbi tamen virtus Actiua Agentis necessario debet esse maior, quam Resistentia Passiua Passi. Mixtio, quæ est miscibilium alteratorum vnio, ex omnibus Elementis Naturaliter est possibilis. elucetq; vel maximè in liquoribus tam eiusdem, quam diuersæ Speciei, dummodo habeant Qualitates contrarias & dissimiles.

Elementum est Corpus simplex in quod Mixta resoluntur, ipsum autem in alia non resoluitur. & sunt 4. Ignis summè calidus & summè siccus. Aer, temperatè calidus & humidus. Aqua, summè humida & remissè frigida. Terra summè frigida & remissè sicca. Vnde ex quolibet Elemento, aliud quodlibet potest immediatè generari. Nobilitas eorum desumitur ex ratione superioris vel inferioris Loci, quem possident, in quo tamen nec grauitant nec leuitant quoad Actum Exercitum considerata. In Mixto manent omnia, non Formaliter, sed Virtualiter, Qualitatibus suis attemperatis & ad mediocritatem reductis. Harum Temperamentum in Mixtis aequale ad pondus Naturali-

turaliter non est possibile. Vel maxime exinde, quod à Proportionem Æqualitatis non derur Actio. Ad extremum Res Permanens semel corrupta etfi Naturali Virtute non possit reproduci, bene tamen Virtute Diuina. Res vero Successiuæ nec per Absolutam Dei Potentiam.

EX LIBRIS METEORORVM.

Meteororum Causa Materialis Proxima est Vapor aut Exhalatio. Causa Efficiens Per se, Virtus Solis & Astrorum, Causa verò Per accidens potest esse Antiperisthasis seu Contrarium Obsidens. Loca propria in quibus generantur Meteora, sunt Aer, Aqua & Terra, maxime verò Aer, in Supremam, Mediam & Infimam Regionem subdiuisus, Ignis verò nunquam nec Corpora Cælestia. De numero Meteororum Igneorum, quæ in Suprema Aëris Regione generantur, primum tenent locum Cometæ, præter quos, dati Æthereos, exactior Astronomorum obseruatio adinuenit, maxime verò ex minoritate Parallaxeos dati Cometæ, quam sit Parallaxis Lunaris.

EX LIBRIS DE ANIMA.

I.

Anima, sicut rectè definitur, quod sit Actus primus Corporis Physici Organici, potentiâ vitam habentis, ita consimiliter diuiditur in Vegetatiuam, Sensitiuam & Intellectiuam, quarum sicut Intellectiua continet in se Formaliter Eminenter Sensitiuam & Vegetatiuam, ita Sensitiua Vegetatiuam, idque secundum rationes communes, seclusis tamen imperfectioribus. Anima Hominis & aliæ perfectorum Animalium sunt indiuisibiles, secus verò Animalium imperfectorum & Plantarum. In Animalibus tandem perfectioribus, Sanguis naturalis, Cholera, Phlegma & Melancholia, item Caro, Cerebrum, Ossa, Medulla Spinalis, Nerui, Capilli, Ungues, Dentes informantur Animâ Totius Compositi, non tamen Lac & Semen.

II.

Animæ in communi sumptæ, Potentiæ sunt 5. scilicet Vegetatiua, Sensitiua, Appetitiua, Loco Motiua & Intellectiua, illæque tum ab Anima, tum inter se Realiter distinguuntur. Ex his Inorganicæ ut Intellectiua & Appetitiua subieciuntur in Anima; reliquæ verò tres Organicæ in Toto Composito. Omnes tamen in vniuersum Potentiæ specificantur ab Actibus & Obiectis Formalibus, ab Actibus quidem immediate sicut & Habitus, ab Obiectis autem, mediantibus Actibus.

III.

Vegetatiuæ Animæ Potentiæ sunt tres, Nutritiua. Augmentatiua & Generatiua, illæque tum inter se, tum à Calore Naturali distinguuntur Realiter. Animæ verò Sensitiuæ, Potentiæ Externæ sunt 5. 1. Visiua, cuius Obiectum est Coloratum quatenus illuminatum. Organum, Pupilla simul cum Neruis Opticis. Medium, Aer vel Aqua, vel aliud diaphanum. 2. Potentia est Auditiva, cuius Obiectum est Sonus. Organum Aer adnatus intra tympanum conclusus, tum quoque Nerui auditorij à Cerebro ad Aures descendentes. Medium, Aer externus propulsans Aerem adnatum tympano inclusum. 3. est Olfactiua, cuius Obiectum est Odor. Organum duæ Carunculae spongiosæ Neruis coniunctæ. Medium Aer & Aqua. 4. Gustatiua, cuius Obiectum est Sapor. Medium Nerui molliores per linguæ spongiosam maxime uerò extremam partem sparsi & ad palatum vsque protensi. Medium est Calor linguæ. 5. demum est Tactiua, cuius Obiectum sunt Qualitates tangibiles tam primæ, quam secundæ. Organum, Nervus tacticus in modum retis per totum Corpus diffusus, qui in pulpis digitorum maxime viget. Medium eius est Caro.

IV.

Ex enumeratis hætenus quinque Potentijs, vnaquæque respectu operationis seu cognitionis sui Obiecti, quanquam sit Actiua, respectu tamen Obiecti

Obiecti quod recipit, est purè Passiua, vt constat in Potentia Visua, cuius sensatio fit per Intus susceptionem Specierum Intentionalium, non verò per Extra missionem Radium. Porro Obiectum vniuscuiusque debet esse Singulare, localiter præsens, extensum, & in debita distantia. Et licet Potentiæ Sensuum Exteriorum circa Proprium Sensibile Per se non errent, bene tamen Per accidens; iamuerò circa Sensibile Commune vtroque modo errare possunt, Excellens tandem Sensibile, vt est Agens Naturale, lædit Sensum, non tamen vt est Intentionale, nisi forte Per accidens.

V.

Sensus Interni communiter assignantur 4. videlicet Sensus Communis, qui est Potentia perceptiva & iudicatiua Sensibilium externorum. Imaginatiua seu Phantasia, quæ est perceptiua Obiectorum Sensibilium, in absentia eorum. Æstimatiua, quæ est apprehensiuua insensatorum in præsentia Obiecti. v. g. Amicitiae vel Inimicitiae Et Memoratiua, quæ est potentia conseruatiua Specierum Insensatarum per Æstimatiuam, à Sensatis abstractarum.

VI.

Anima Rationalis est purè spiritualis, obindeque incorruptibilis & immortalis, tunc à Deo creatur, quando in Corpus dispositum infunditur, estque Subsistens & Existens Per se, consequenter siue sit in Corpore, siue extra illud, habet Esse independens à Corpore, licet Actu communicet se eidem. Vna potest esse indiuidualiter perfectior altera. Potentiæ famosæ eius sunt duæ, Intellectus & Voluntas, omnino inter se Realiter distinctæ.

VII.

Intellectus nostri Adæquatum Obiectum Terminatiuum & Extensionis est Ens Verum latissimè sumptum. Motiuum autem & Intensionis, pro hoc statu est sola Quidditas Rei Materialis quatenus abstracta à Conditionibus Materialibus & singularibus: in statu verò separationis sunt Quidditates Rerum Spiritualium earum quæ sunt incompletæ, & habent eundem Gradum immaterialitatis. Et cum Sensus sit Singularium, sicut Intellectus Vniuersalium, Species proinde Intelligibilis pro hoc statu non potest directe & Formaliter repræsentare Singulare Materiale.

VIII.

Intellectio nostra, quæ est quædam Actio Metaphysica, etsi pro hoc statu dependet Naturaliter à Phantasmate, & fit per conuersionem ad illud, Species Intelligibiles ab eo desumendo; non tamen in statu Separationis, in quo Intellectus accipit Species à Deo sibi infusas. Est autem Intellectio, Qualitas distincta à Verbo Mentis, non tamen à Dictione, quæ est ipsum Intelligere cum quodam modo: Omnis quippe Intellectio est Dictio, excepta Visione beatifica.

IX.

Appetitus Elicitus seu Animalis, qui præsupponit cognitionem & sequitur illam, rectè diuiditur in Intellectiuum cuius, Obiectum est Vniuersale sub ratione Boni. Et Sensitiuum, cuius Obiectum est Partiale. Sensitiuus deinde subdiuiditur in Concupiscibilem, qui tendit in Bonum Delectabile secundum Sensum, vt illud consequatur & illo fruatur. Et Irascibilem, qui pro Obiecto habet Bonum Arduum, propulsando Malum ad conseruationem & defensionem Animalis.

X.

Voluntas nostra est libera, quæ licet omnia Bona liberè appetat, solam tamen Beatitudinem seu Bonum in communi, necessariò vult. Necessitare Specificationis alias Contrarietatis; licet nullo modo necessitetur circa Beatitudinem in particulari hic in Via, in Patria verò omnino necessitatur etiam Necessitate quoad Exercitium seu Contradictionis. Hæc tamen stantibus, Intellectus (vt pote primaria Animæ Potentia) secundum se & secundum Esse Physicum, est Simpliciter perfectior, quam Voluntas.

CONCLVSIONES METAPHYSICÆ.

I.

Metaphysica est verè & propriè Sapiëntia, quæ Speculatur Ens Reale vt sic, secundùm rationes ab omni Materia seu Corporeitate abstractas, Deo & Creaturis Transcendentaliter communes. Vnde licet ratione Principiorum subalternet sibi alias Scientias, non tamen considerat Essentias Rerum quoad propria Prædicata Scientiarum.

II.

Ratio Entis quòniã transcendit Formaliter omnes & singulas Rerum Differentias, ideo respectu Entis Realis & Rationis, Dei & Creaturæ, substantiæ & Accidentis, est Analoga. Vnde hoc ipsum Ens non habet Conceptum aliquem Vniuocum simpliciter & perfecte præcisum a suis Inferioribus, tam Obiectiuum quàm Formalem.

III.

Ens habet Veras, easque Reales Passiones tres, .i. Vnum, Verum, Bonum, sola Ratione à se distinctas; quæ quidem pro Materiali dicunt ipsum Ens, pro Formali autem Modos quosdam, qui non exprimuntur nomine ipsius Entis. Et sic Vnum (præter Entitatem quam principaliter dicit, & est quid Positivum) addit supra Ens Negationem Diuisionis. Verum addit Conformitatem seu Conuenientiam, quam habet Res cum Intellectu verè illam concipientè primario quidem cum Intellectu Diuino, secundario autem cum Intellectu Humano. Bonum denique addit Conuenientiam cum Appetitu, alias Perfectionem Rei Radicaliter appetibilis à Voluntate.

IV.

Substantiæ Materiales indiuiduantur à Materia signata Quantitate. Imateriales verò Substantiæ Completæ, seipsis, & Incompletæ, per ordinem ad Corpus. Accidentia tandem à proprijs indiuiduantur Subiectis. Vnde in Substantijs, Materialib⁹ Completis, Differentia Indiuidualis dicit aliquid Reale supra Differentiam Specificam, illud tamen solâ Ratione ratiocinata, distinctum. In Immaterialibus verò Completis eadem Differentia Indiuidualis, nihil addit Reale supra, quod sit distinctum Re aut Ratione.

V.

Essentia & Existentia licet in Deo identificentur Realiter, in Creatis tamen distinguuntur Realiter, Modaliter. Vnde sicut Essentiæ Rerum non sunt ab æterno aliquid Reale, Actuale & Positivum extra Deum, ita Existentiæ solus Deus est Causa Principalis productiua, Causæ verò Secundæ, sunt Causæ Instrumentales; estque hæc ipsa in vnò Compositò Physico simplex & vnica simpliciter, per quam existunt omnes Partes. Porro non solum Substantiæ sed & Accidentis (de cuius Ratione Formali est Inhærentia Aptitudinalis) Essentia etiam distinguitur ab Existentia seu Actuali illius Inhærentia, sine qua tametsi Accidentia Physicè & secundùm Esse Reale intelligi nequeant, bene tamen Mathematicè & secundùm Esse Rationis.

VI.

Subsistentia & Personalitas in Creaturis Rationalibus, est aliquid Reale Positivum Naturæ superadditum, & Realiter Modaliter ab ea distinctum: illa quippe reddit Naturam Subsistentem & Incommunicabilem alteri vt Supposito, hæc verò Naturæ Intellectuâlis reddit indiuiduam & incommunicabilem Substantiam. Porro Subsistentia cum emanet ab Essentia, prius Naturâ terminat Essentiam seu Naturam, posteriùs verò Existentiam, estque in Composito Physico vna totalis, per quam primò existit Totum, secundario verò Partes. Vnde licet Essentia sit perfecta in suo Esse Specifico, tamen Subsistentia est perfectior illâ, Existentia verò perfectissima.

VII.

Intelligentiæ non tantùm secundùm Sacram Scripturam & Eidem, sed etiam secundùm Aristotelem dantur, suntque Formæ Simples respectu Compo-

Compositionis Physicæ, sed non respectu Metaphysicæ. Creatæ à Deo in Celo Empyræo ab ipso Mundi exordio. Incorruptibiles ab intrinseco, per Voluntatem tamen Creatoris sui annihilari possunt. Quarum numerus licet excedat numerum Specierum Materialium, est tamen certus & determinatus. Operationes illarum fiunt per Intellectum & Voluntatem, intelligunt Intuitiue per Species intelligibiles sibi à Deo concreatas, in quibus clarissime cognoscunt Res Naturales, loquuntur autem ad inuicem per directionem liberam suorum Conceptuum, & licet formata à se assumant Corpora, in illis tamen Vitaliter non operantur.

VIII.

Intelligentia Prima & Suprema, Deus .i. Gloriosus est Causa Efficiens Creaturarum per Creationem, quæ ipsi soli competit ita, vt etiam Creatura non possit assumi vt Instrumentum Physicum ad creandum. Ab eo Res omnes dependent in Fieri, in Facto Esse, & in Conseruari, cumque sit liber, sicut eas liberè conseruat, ita per liberam sui Concursus subtractionem easdem annihilare potest. Cui tanquam omnium donorum Largitori magnificentissimo, in Cultum Patriæ; Beatissimæ Virgini Mariæ labis Originalis immuni, Cultum Hyperdulæ. Divis Cælitibus, & præsertim Dno IOANNI CANTIO Patriarchæ nostro- in Votivam Dulæ Venerationem labor hic cedat.



Sub Felicissimis Auspicijs

Magnifici, Perillustri, & Admodum Rñdi Domini,

D. M. CHRISTOPHORI
S O W I N S K I,

S. Th. Doctoris & Professoris, Collegæ Maioris,
Ecclesiarum Collegiatarum ad S. FLORIANVM
Decani, Custodis Pilecensis, Cancellarij Posnani-
ensis, Curati Prosouicensis, Collegij Vladislaviani
& Contubernij Philosophorum Prouisoris,
Studij Almæ Vniuersitatis Cracouiensis
Generalis ac Vigilantissimi
R E C T O R I S.

Handwritten text at the top of the page, mostly illegible due to fading.

Second block of handwritten text, also mostly illegible.



Third block of handwritten text, mostly illegible.

Fourth block of handwritten text, mostly illegible.

Fifth block of handwritten text, mostly illegible.



Handwritten text in red ink at the bottom right corner, possibly a date or signature.



